

**«ՈՍԿԵՎԱՆ» ՀԱՅՐԵՆԱԿՑԱԿԱՆ ՄԻՈՒԹՅՈՒՆ
ՀԱՍԱՐԱԿԱԿԱՆ ԿԱԶՄԱԿԵՐՊՈՒԹՅԱՆ
ԸՆԴՀԱՆՈՒՐ ԺՈՂՈՎ**

ՈՐՈՇՈՒՄ N1

25.07.2025թ.

գ. Ոսկեվան


**«ՈՍԿԵՎԱՆ» ՀԱՅՐԵՆԱԿՑԱԿԱՆ ՄԻՈՒԹՅՈՒՆ
ՀԱՍԱՐԱԿԱԿԱՆ ԿԱԶՄԱԿԵՐՊՈՒԹՅԱՆ ԱՆԴԱՄ ԸՆԴՈՒՆԵԼՈՒ ԵՎ
ԱՆԴԱՄՈՒԹՅՈՒՆԻՑ ՀԵՌԱՑՆԵԼՈՒ ԿԱՆՈՆԱԿԱՐԳԸ
ՍԱՀՄԱՆԵԼՈՒ ՄԱՍԻՆ**

Ղեկավարվելով «Հասարակական կազմակերպությունների մասին» Հայաստանի Հանրապետության օրենքով, «Ոսկեվան» հայրենակցական միություն հասարակական կազմակերպության (այսուհետ՝ Կազմակերպություն) կանոնադրության 23-րդ կետի 7-րդ ենթակետով, «Ոսկեվան» հայրենակցական միություն հասարակական կազմակերպության ընդհանուր ժողովը միաձայն որոշեց՝


1. Սահմանել «Ոսկեվան» հայրենակցական միություն հասարակական կազմակերպության անդամ ընդունելու և անդամությունից հեռացնելու կանոնակարգը՝ համաձայն հավելվածի:

2. «Ոսկեվան» հայրենակցական միություն հասարակական կազմակերպության նախագահ Բ. Սաֆարյանին՝ ապահովել «Ոսկեվան» հայրենակցական միություն հասարակական կազմակերպության անդամ ընդունելու և անդամությունից հեռացնելու կանոնակարգ»-ի տեղադրումը կայքում ու այլ միջոցներով հանրայնացումը:

Ընդհանուր ժողովի նախագահ՝

 Վ. Կեցարյան

Ընդհանուր ժողովի քարտուղար՝

 Գ. Բաճալյան

25.07.2025թ.

ԿԱՆՈՆԱԿԱՐԳ
«ՈՍԿԵՎԱՆ» ՀԱՅՐԵՆԱԿՑԱԿԱՆ ՄԻՈՒԹՅՈՒՆ
ՀԱՍԱՐԱԿԱԿԱՆ ԿԱԶՄԱԿԵՐՊՈՒԹՅԱՆ ԱՆԴԱՄ ԸՆԴՈՒՆԵԼՈՒ ԵՎ
ԱՆԴԱՄՈՒԹՅՈՒՆԻՑ ՀԵՌԱՑՆԵԼՈՒ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կանոնակարգով կարգավորվում է «Ոսկեվան» հայրենակցական միություն հասարակական կազմակերպության (այսուհետ՝ Կազմակերպություն) անդամ ընդունելու և անդամությունից հեռացնելու հետ կապված հարաբերությունները:

2. «Հասարակական կազմակերպությունների մասին» Հայաստանի Հանրապետության օրենքով և Կազմակերպության կանոնադրությամբ սահմանված կարգով Կազմակերպության անդամ կարող են դառնալ՝

1) Ոսկեվանից Հայաստանի Հանրապետության և օտարերկրյա պետությունների այլ բնակավայրեր մշտական բնակության տեղափոխված անձինք.

2) Ոսկեվանից Հայաստանի Հանրապետության և օտարերկրյա պետությունների այլ բնակավայրեր մշտական բնակության տեղափոխված անձանց ամուսինները, զավակները, նրանց սերունդները.

3) Ոսկեվանի մշտական բնակիչները.

4) այլ անձինք՝ որպես պատվավոր անդամ:

II. ԿԱԶՄԱԿԵՐՊՈՒԹՅԱՆ ԱՆԴԱՄ ԸՆԴՈՒՆԵԼՈՒ ԿԱՐԳԸ

3. Կազմակերպության անդամ դառնալու ցանկություն հայտնած անձին Կազմակերպության Գործադիր մարմինը ծանոթացնում է Կազմակերպության նպատակներին, Կազմակերպության անդամների իրավասություններին, անդամավճարի չափին և վճարման կարգին, ինչպես նաև կանոնադրության այլ դրույթներին ու ներքին կանոնակարգերին:

4. Սույն Կանոնակարգի 3-րդ կետում նշված ակտերին իրազեկվելուց հետո Կազմակերպության անդամ դառնալու ցանկություն ունեցող անձը Կազմակերպության Նախագահին ներկայացնում է դիմում՝ համաձայն կցվող Ձևի:

5. Կազմակերպության Նախագահը ուսումնասիրելով Կազմակերպության անդամ դառնալու ցանկություն ունեցող անձի դիմումը և կից փաստաթղթերը, անհրաժեշտության դեպքում կարող է պահանջել լրացուցիչ փաստաթղթեր:

6. Սույն Կանոնակարգի 5-րդ կետում ամրագրված դիմումի ուսումնասիրության համար սահմանվում է 5 աշխատանքային օր:

7. Կազմակերպության կանոնադրության 9-րդ կետի 4-րդ ենթակետում նշված դեպքերում Կազմակերպության պատվավոր անդամի նախաձեռնությունը կարող են ներկայացնել՝

- 1) Կազմակերպության նախագահը.
- 2) Կազմակերպության Խորհրդի առնվազն 3 անդամ.
- 3) Կազմակերպության անդամների առնվազն 1/4-րդը:

8. Կազմակերպությանն անդամակցելու մասին դիմումի ուսումնասիրության դրական արդյունքների դեպքում Նախագահը Կազմակերպության կանոնադրության՝

1) 11-րդ կետի 1-ին ենթակետին համապատասխանելու դեպքում 3 աշխատանքային օրվա ընթացքում լուծում է Կազմակերպության անդամության մեջ ընդունելու հարցը.

2) 11-րդ կետի 2-րդ ենթակետին համապատասխանելու դեպքում 5 աշխատանքային օրվա ընթացքում ներկայացնում է Կազմակերպության Խորհրդի քննարկմանը: Սույն ենթակետում նշված դեպքերում Խորհրդը Կազմակերպության անդամության մեջ ընդունելու հարցը լուծում է 5 աշխատանքային օրվա ընթացքում նիստ հրավիրելու կամ հեռավար քննարկան միջոցով.

3) 11-րդ կետի 3-րդ ենթակետին համապատասխանելու դեպքում ներկայացնում է Կազմակերպության Ընդհանուր Ժողովի առաջիկա նիստի քննարկմանը:

9. Կազմակերպության Ընդհանուր Ժողովի առաջիկա նիստում ներկայացնում է Կազմակերպության նոր անդամներին:

10. Կազմակերպության անդամի կողմից Կազմակերպությունից դուրս գալու դիմում ներկայացնելու դեպքում Նախագահը դիմումը քննարկում է և Կազմակերպությունից դուրս գալու հարցը լուծվում է սույն Կանոնակարգի 6-ից 8-րդ կետերում ամրագրված կարգով ու ժամկետներում:

III. ԿԱԶՄԱԿԵՐՊՈՒԹՅԱՆ ԱՆԴԱՄՈՒԹՅՈՒՆԻՑ ՀԵՌԱՑՆԵԼԸ

11. Կազմակերպության անդամը Կազմակերպության անդամությունից կարող է հեռացվել՝

- 1) Կազմակերպության կամ Կազմակերպության անդամների անունից քաղաքական գործունեությամբ զբաղվելու դեպքում.
- 2) Կազմակերպությունը կամ Կազմակերպության անդամներին նախընտրական, ընտրական կամ քաղաքական այլ գործընթացներում ներգրավելու կամ ներգրավելու փորձերի դեպքում.
- 3) Ֆինանսական, գույքային և այլ չարաշահումների դեպքում.

4) Կազմակերպության ներքին կարգապահական կանոնները խախտելու դեպքում

5) «Հասարակական կազմակերպությունների մասին» Հայաստանի Հանրապետության օրենքի, Կազմակերպության կանոնադրության և այլ հրավական ակտերի պահանջները խախտելու դեպքում:

12. Կազմակերպության անդամին Կազմակերպության անդամությունից հեռացնելու միջնորդությունը կարող են ներկայացնել՝

1) Կազմակերպության նախագահը.


2) Կազմակերպության Խորհրդի առնվազն 2 անդամ.

3) Կազմակերպության անդամների առնվազն 1/6-րդը:


13. Կազմակերպության անդամին Կազմակերպության անդամությունից հեռացնելու միջնորդությունը Նախագահը դիմումը քննարկում է և Կազմակերպությունից անդամությունից հեռացնելու հարցը լուծվում է Կազմակերպության կանոնադրության 12-րդ կետում ու սույն Կանոնակարգի 6-ից 8-րդ կետերում ամրագրված կարգով ու ժամկետներում, բացառությամբ՝ սույն Կանոնակարգի 14-րդ կետով սահմանված դեպքի:

14. Կազմակերպության պատվավոր անդամին Կազմակերպությունից հեռացնելու միջնորդության առկայության ու Խորհրդի համաձայնության դեպքում Նախագահը, հեռացման հարցը լուծելու դեպքում, կարող է հրավիրել հեռավար արտահերթ Ընդհանուր ժողով:

Ընդհանուր ժողովի նախագահ՝

 Վ. Խաչատրյան

Ընդհանուր ժողովի քարտուղար՝

 Կ. Բադալյան